

史記



生

記

史記

漢 宋 唐 唐

司馬遷撰
裴駰集解
司馬貞索隱
張守節正義

第九冊

卷一〇二至卷一一七

中華書局

史記卷一百二

張釋之馮唐列傳第四十二

張廷尉釋之者，堵陽人也，〔一〕字季。有兄仲同居。以訾爲騎郎，〔二〕事孝文帝，十歲不得調，無所知名。釋之曰：「久宦減仲之產，不遂。」欲自免歸。中郎將袁盎知其賢，惜其去，乃請徙釋之補謁者。〔三〕釋之既朝畢，因前言便宜事。文帝曰：「卑之，毋甚高論，令今可施行也。」〔四〕於是釋之言秦漢之閒事，秦所以失而漢所以興者久之。文帝稱善，乃拜釋之爲謁者僕射。

〔一〕索隱 韋昭堵音緒，又音如字，地名，屬南陽。

〔二〕正義 應劭曰：「哀帝改爲順陽，水東南入蔡。」〔三〕括地志云：「順陽故城在鄧州穰縣西三十里，楚之郢邑也。及蘇秦傳云『楚北有郢陽』，並謂此也。」

〔四〕集解 蘇林曰：「顧錢若出穀也。」如淳曰：「漢儀注誓五百萬得爲常侍郎。」〔五〕索隱 訾音子移反。字苑云「貲，積財也」。

〔三〕正義 百官表云「謁者，掌賓讚受事，員十七人，秩比六百石」也。

〔四〕索隱 案：卑，下也。欲令且卑下其志，無甚高談論，但令依時事，無說古遠也。

釋之從行，登虎圈。^(二)上問上林尉^(三)諸禽獸簿，十餘問，尉左右視，盡不能對。虎圈
 嗇夫^(三)從旁代尉對上所問禽獸簿甚悉，欲以觀其能口對響應無窮者。文帝曰：「吏不當
 若是邪？尉無賴！」^(四)乃詔釋之拜嗇夫爲上林令。釋之久之前曰：「陛下以絳侯周勃何如
 人也？」上曰：「長者也。」又復問：「東陽侯張相如何如人也？」上復曰：「長者。」釋之曰：「
 夫絳侯、東陽侯稱爲長者，此兩人言事曾不能出口，豈數此嗇夫諛諛^(五)利口捷給哉！且
 秦以任刀筆之吏，吏爭以亟疾苛察相高，然其敝徒文具耳，^(六)無惻隱之實。以故不聞其
 過，陵遲而至於二世，天下土崩。今陛下以嗇夫口辯而超遷之，臣恐天下隨風靡靡，爭爲口
 辯而無其實。且下之化上疾於景響，舉錯不可不審也。」文帝曰：「善。」乃止不拜嗇夫。

〔一〕正義 求遠反。

〔二〕索隱 漢書表上林有八丞十二尉。百官志尉秩三百石。

〔三〕正義 掌虎圈。百官表有鄉嗇夫，此其類也。

〔四〕集解 張晏曰：「才無可恃。」

〔五〕集解 晉灼曰：「音牒。」索隱 音牒。漢書作「喋喋」，口多言。

〔六〕索隱 案：謂空具其文而無其實也。

上就車，召釋之參乘，徐行，問釋之秦之敝。具以實言。(二)至宮，上拜釋之爲公車令。

〔二〕集解 如淳曰：「質，誠也。」

頃之，太子與梁王共車入朝，不下司馬門，(一)於是釋之追止太子、梁王無得入殿門。遂劾不下公門不敬，奏之。薄太后聞之，文帝免冠謝曰：「教兒子不謹。」薄太后乃使使承詔赦太子、梁王，然後得入。文帝由是奇釋之，拜爲中大夫。

〔二〕集解 如淳曰：「宮衛令『諸出入殿門公車司馬門，乘輅傳者皆下，不如令，罰金四兩』。」

頃之，至中郎將。從行至霸陵，居北臨廁。(二)是時慎夫人從，上指示慎夫人新豐道，曰：「此走邯鄲道也。」(三)使慎夫人鼓瑟，上自倚瑟而歌，(四)意慘悽悲懷，顧謂羣臣曰：「嗟乎！以北山石爲椁，(五)用紵絮(六)斲陳，蔡漆其間，(七)豈可動哉！」左右皆曰：「善。」釋之前進曰：「使其中有可欲者，雖錮南山猶有郤；(八)使其中無可欲者，雖無石椁，又何戚焉！」文帝稱善。其後拜釋之爲廷尉。

〔一〕集解 李奇曰：「霸陵北頭廁近霸水，帝登其上，以遠望也。」如淳曰：「居高臨垂邊曰廁也。」蘇林曰：「廁，邊側也。」韋昭曰：「高岸夾水爲廁也。」

〔索隱〕劉氏廁音初吏反。按：李奇曰「霸陵北頭廁近霸水」。蘇林曰「廁，

邊側也」。包愷音側，義亦兩通也。

〔三〕集解 張晏曰：「愼夫人，邯鄲人也。」如淳曰：「走音奏，趨也。」索隱 音奏。案：走猶向也。

〔三〕集解 漢書音義曰：「聲氣依倚瑟也。」書曰：「聲依永。」索隱 倚，於矯反。案：謂歌聲合於瑟聲，相依倚也。

〔四〕正義 顏師古云：「美石出京師北山，今宜州石是。」

〔五〕索隱 上張呂反，下息慮反。

〔六〕集解 徐廣曰：「斲，一作錯。」駢案：漢書音義曰「斲絮，以漆著其間也。」索隱 斲陳絮漆其間。斲音側略反。

反。絮音女居反。案：斲陳絮以漆著其間也。

〔七〕集解 張晏曰：「鋼，鑄也。帝北向，故云『北山』；迴顧南向，故云『南山』。」索隱 案：張晏云「鋼，鑄也。帝北向，故云『北山』；迴顧向南，故云『南山』」。今案：大顏云「北山青石肌理密，堪爲碑槨，至今猶然。故秦本紀作

阿房，或作鄠山石槨是也」。故帝欲北山之石爲槨，取其精牢。釋之答言，但使薄葬，冢中無可貪，雖無石槨，有何

憂焉。若使厚殉，冢中有物，雖并鋼南山，猶爲人所發掘也。言「南山」者，取其高厚之意，張晏殊失其旨也。

頃之，上行出中渭橋，^{〔二〕}有一人從橋下走出，乘輿馬驚。於是使騎捕，屬之廷尉。釋之治問。曰：「縣人來，^{〔三〕}聞蹕，匿橋下。久之，以爲行已過，卽出，見乘輿車騎，卽走耳。」廷尉奏當，一人犯蹕，當罰金。^{〔三〕}文帝怒曰：「此人親驚吾馬，吾馬賴柔和，令他馬，固不敗傷我乎？而廷尉乃當之罰金！」釋之曰：「法者天子所與天下公共也。」^{〔四〕}今法如此而更重

之，是法不信於民也。且方其時，上使立誅之則已。今既下廷尉，廷尉，天下之平也，一傾而天下用法皆爲輕重，民安所措其手足？唯陛下察之。」良久，上曰：「廷尉當是也。」

〔二〕集解 張晏曰：「在渭橋中路。」瓚曰：「中渭橋兩岸之中。」索隱 張晏、臣瓚之說皆非也。案今渭橋有三所：

一所在城西北咸陽路，曰西渭橋；一所在東北高陵道，曰東渭橋；其中渭橋在古城之北也。

〔三〕集解 如淳曰：「長安縣人。」

〔三〕集解 如淳曰：「乙令『蹕先至而犯者罰金四兩』。蹕，止行人。」索隱 案：崔浩云「當謂處其罪也」。案：百

官志云「廷尉平刑罰，奏當所應。郡國讞疑罪，皆處當以報之」也。

〔四〕索隱 小顏云：「公謂不私也。」

其後有人盜高廟坐前玉環，捕得，文帝怒，下廷尉治。釋之案律盜宗廟服御物者爲奏，奏當弃市。上大怒曰：「人之無道，乃盜先帝廟器，吾屬廷尉者，欲致之族，而君以法奏之，」非吾所以共承宗廟意也。」釋之免冠頓首謝曰：「法如是足也。」且罪等，然以逆順爲差。今盜宗廟器而族之，有如萬分之一，假令愚民取長陵一抔土，陛下何以加其法乎？」久之，文帝與太后言之，乃許廷尉當。是時，中尉條侯周亞夫與梁相山都侯王恬開見釋之持議平，乃結爲親友。張廷尉由此天下稱之。

〔一〕索隱 案：法者，依律以斷也。

〔三〕集解 徐廣曰：「足，一作『止』也。」

〔三〕**集解**如淳曰：「俱死罪也，盜玉環不若盜長陵土之逆也。」

〔四〕**集解**張晏曰：「不欲指言，故以取土譬也。」

索隱杯音步侯反。案：《禮運》云「汙尊而杯飲」，鄭氏云「杯，手掬

之，字從手」。字本或作「盃」，言一勺一杯，兩音並通。又音普迴反。坏者，磚之未燒之名也。

張晏云「不欲指

言，故以取土譬」者，蓋不欲言盜開長陵及說傷迫近先帝故也。

〔五〕**集解**徐廣曰：「一作『聞』」。漢書作『啓』。啓者，景帝諱也，故或爲『開』。

後文帝崩，景帝立，釋之恐，〔一〕稱病。欲免去，懼大誅至；欲見謝，則未知何如。用王生計，卒見謝，景帝不過也。

〔二〕**索隱**謂帝爲太子時，與梁王入朝，不下司馬門，釋之會劾，故恐也。

王生者，善爲黃老言，處士也。嘗召居廷中，三公九卿盡會立，王生老人，曰「吾轡解」，〔一〕顧謂張廷尉：「爲我結轡！」〔二〕釋之跪而結之。既已，人或謂王生曰：「獨柰何廷辱張廷尉，使跪結轡？」王生曰：「吾老且賤，自度終無益於張廷尉。張廷尉方今天下名臣，吾故聊辱廷尉，使跪結轡，欲以重之。」諸公聞之，賢王生而重張廷尉。

〔一〕**正義**上萬越反，下閑賈反。

〔二〕**索隱**結音如字，又音計。

張廷尉事景帝歲餘，爲淮南王相，猶尙以前過也。久之，釋之卒。其子曰張摯，字長公，

官至大夫，免。以不能取容當世，故終身不仕。^{〔二〕}

〔二〕索隱 謂性公直，不能曲屈見容於當世，故至免官不仕也。

馮唐者，其大父趙人。父徙代。漢興徙安陵。唐以孝著，爲中郎署長，^{〔一〕}事文帝。文帝輦過，^{〔三〕}問唐曰：「父老何自爲郎？」^{〔三〕}家安在？」唐具以實對。文帝曰：「吾居代時，吾尙食監高祛數爲我言趙將李齊之賢，戰於鉅鹿下。今吾每飯，意未嘗不在鉅鹿也。」^{〔四〕}父知之乎？」唐對曰：「尙不如廉頗、李牧之爲將也。」上曰：「何以？」唐曰：「臣大父在趙時，爲官^{〔卒〕}將，^{〔五〕}善李牧。臣父故爲代相，善趙將李齊，知其爲人也。」上旣聞廉頗、李牧爲人，良^{〔六〕}說，而搏髀曰：「嗟乎！吾獨不得廉頗、李牧時爲吾將，吾豈憂匈奴哉！」唐曰：「主臣！」^{〔七〕}陛下雖得廉頗、李牧，弗能用也。」上怒，起入禁中。良久，召唐讓曰：「公柰何衆辱我，獨無閒處乎？」唐謝曰：「鄙人不知忌諱。」

〔一〕集解 應劭曰：「此云孝子郎也。」或曰以至孝聞。索隱 案：謂爲郎署之長也。

〔二〕索隱 過晉戈。謂文帝乘輦，會過郎署。

〔三〕索隱 案：崔浩云「自，從也。帝詢唐何從爲郎」。又小顏云「年老矣，乃自爲郎，怪之也」。

〔四〕集解 張晏曰：「每食念監所說李齊在鉅鹿時。」

〔五〕集解 徐廣曰：「一云『官士將』。」駢案：晉灼曰「百人爲徹行，亦皆帥將也」。

案國語「百人爲徹行，行頭皆官師」。賈逵云「百人爲一隊也。官師，隊大夫也」。

〔六〕集解 如淳曰：「良，善也。」

〔七〕索隱 案：樂彥云「人臣進對前稱『主臣』，猶上書前云『昧死』」。案：志林云「馮唐面折萬乘，何言不懼」，主臣爲驚怖，其言益著也。又魏武謂陳琳云「卿爲本初檄，何乃言及上祖」，琳謝云「主臣」，益明主臣是驚怖也。解

已見前志也。

當是之時，匈奴新大入朝那，〔一〕殺北地〔二〕都尉卬。〔三〕上以胡寇爲意，乃卒復問唐曰：「公何以知吾不能用廉頗、李牧也？」唐對曰：「臣聞上古王者之遣將也，跪而推轂，曰：『闔以內者，〔四〕寡人制之；闔以外者，將軍制之。軍功爵賞皆決於外，歸而奏之。此非虛言也。臣大父言，李牧爲趙將居邊，軍市之租皆自用饗士，〔五〕賞賜決於外，不從中擾也。委任而責成功，故李牧乃得盡其智能，遣選車千三百乘，〔六〕穀騎萬三千，〔七〕百金之士十萬，〔八〕是以北逐單于，破東胡，〔九〕滅澹林，〔一〇〕西抑彊秦，南支韓、魏。當是之時，趙幾霸。〔一一〕其後會趙王遷立，其母倡也。〔一二〕王遷立，乃用郭開讒，卒誅李牧，〔一三〕令顏聚代之。〔一四〕是以兵破土北，爲秦所禽滅。今臣竊聞魏尚爲雲中守，〔一五〕其軍市租盡以饗士卒，〔一六〕出私養錢，〔一七〕五日一椎牛，〔一八〕饗賓客軍吏舍人，是以匈奴遠避，不近雲中之塞。虜曾一

入，尙率車騎擊之，所殺甚衆。夫士卒盡家人子，^(一)起田中從軍，安知尺籍伍符。^(二)終日力戰，斬首捕虜，上功莫府，^(三)一言不相應，^(四)文吏以法繩之。其賞不行而吏奉法必用。臣愚，以爲陛下法太明，賞太輕，罰太重。且雲中守魏尙坐上功首虜差六級，陛下下之吏，削其爵，罰作之。由此言之，陛下雖得廉頗、李牧，弗能用也。^(五)臣誠愚，觸忌諱，死罪死罪！」文帝說。是日令馮唐持節赦魏尙，復以爲雲中守，而拜唐爲車騎都尉，主中尉及郡國車士。^(六)

〔一〕索隱 上晉朝，早也。下晉乃何反，縣名，屬安定也。

〔正義〕在原州百泉縣西北十里，漢朝鄯縣是也。

〔二〕正義 北地郡，今寧州也。

〔三〕索隱 案：都尉姓孫名印。

〔四〕集解 章昭曰：「此郭門之闔也。門中概曰闔。」

〔索隱〕概音其月反。

〔正義〕闔音苦本反。謂門限也。

〔五〕索隱 案：謂軍中立市，市有稅。稅卽租也。

〔六〕索隱 案：六韜書有選車之法。

〔七〕索隱 如淳云：「轂音構。轂騎，張弓之騎也。」

〔八〕集解 服虔曰：「良士直百金也。」或曰直百金，言重。

〔索隱〕晉灼云：「百金取其貴重也。」服虔曰：「良士直

百金也。」劉氏云：「其功可賞百金者。」事見管子及小爾雅。

〔九〕索隱 案：崔浩云「烏丸之先也。國在匈奴之東，故云東胡也」。

〔一〇〕**集解** 徐廣曰：「澹，一作『檐』。」**索隱** 澹，丁甘反。一本作「檐檻」。

〔一一〕**索隱** 幾音祈。

〔一二〕**索隱** 按：列女傳云「邯鄲之倡」。**正義** 趙幽王母，樂家之女也。

〔一三〕**索隱** 按：開是趙之寵臣。**戰國策**云「秦多與開金，使爲反間」。

〔一四〕**索隱** 聚音似喻反。**漢書**作「玁」。本齊將也。**正義** 絕庚反。

〔一五〕**集解** **漢書**曰：「尙，槐里人也。」**正義** 雲中郡故城在勝州榆林縣東北三十里。

〔一六〕**集解** **服虔**曰：「私廩假錢。」**索隱** 按：漢書「市肆租稅之入爲私奉養」，**服虔**曰「私廩假錢」是也。或云官所

別廩給也。

〔一七〕**索隱** 椎音直追反，擊也。

〔一八〕**索隱** 按：謂庶人之家子也。

〔一九〕**集解** 如淳曰：「漢軍法曰吏卒斬首，以尺籍書下縣移郡，令人故行，不行奪勞二歲。五符亦什伍之符，約節度也。」或曰以尺簡書，故曰尺籍也。**索隱** 按：尺籍者，謂書其斬首之功於一尺之板。伍符者，命軍人伍伍相

保，不容姦詐。注「故行不行」，案謂故命人行而身不自行，奪勞二歲也。「故」與「雇」同。

〔二〇〕**索隱** 按：莫訓大也。又崔浩云「古者出征無常處，以幕爲府舍，故云莫府」。「莫」當爲「幕」，古字少耳。

〔二一〕**索隱** 音乙陵反，謂數不同也。

〔二二〕**集解** 班固稱「楊子曰孝文帝親詘帝尊以信亞夫之軍，曷爲不能用頗、牧？彼將有激」。

〔二三〕**集解** **服虔**曰：「車戰之士。」

七年，景帝立，以唐爲楚相，免。武帝立，求賢良，舉馮唐。唐時年九十餘，不能復爲官，乃以唐子馮遂爲郎。遂字王孫，亦奇士，與余善。

太史公曰：張季之言長者，守法不阿意；馮公之論將率，有味哉！有味哉！語曰：「不知其人，視其友」。二君之所稱誦，可著廊廟。書曰：「不偏不黨，王道蕩蕩；不黨不偏，王道便便」。張季、馮公近之矣。

〔二〕集解 徐廣曰：「一作『辨』」。

〔索隱述贊〕張季未偶，見識袁盎。太子懼法，膏夫無狀。驚馬罰金，盜環悟上。馮公白首，味哉論將。因對李齊，收功魏尙。

史記卷一百三

萬石張叔列傳第四十三

萬石君〔一〕名奮，其父趙人也，〔二〕姓石氏。趙亡，徙居溫。〔三〕高祖東擊項籍，過河內，時奮年十五，爲小吏，侍高祖。高祖與語，愛其恭敬，問曰：「若何有？」對曰：「奮獨有母，不幸失明。家貧。有姊，能鼓琴。」高祖曰：「若能從我乎？」曰：「願盡力。」於是高祖召其姊爲美人，以奮爲中涓，〔四〕受書謁，徙其家長安中戚里，〔五〕以姊爲美人故也。其官至孝文時，積功勞至大中大夫。無文學，恭謹無與比。

〔一〕正義 以父及四子皆二千石，故號奮爲萬石君。

〔二〕正義 洛州邯鄲本趙國都。

〔三〕正義 故溫城在懷州溫縣三十里，漢縣在也。

〔四〕正義 顏師古云：「中涓，官名。居中而涓絮也。」如淳云：「主通書謁出入命也。」

〔五〕索隱 小顏云：「於上有姻戚者皆居之，故名其里爲戚里。」長安記戚里在城內。

文帝時，東陽侯張相如爲太子太傅，免。選可爲傅者，皆推奮，奮爲太子太傅。及孝景卽位，以爲九卿；迫近，憚之，^{〔二〕}徙奮爲諸侯相。奮長子建，次子甲，次子乙，^{〔三〕}次子慶，皆以剛行孝謹，^{〔三〕}官皆至二千石。於是景帝曰：「石君及四子皆二千石，人臣尊寵乃集其門。」號奮爲萬石君。

〔二〕集解 張晏曰：「以其恭敬履度，故難之。」

〔三〕集解 徐廣曰：「一作『仁』。」 正義 顏師古云：「史失其名，故云甲乙耳，非其名也。」

〔三〕集解 徐廣曰：「馴，一作『訓』。」 索隱 馴音巡。

孝景帝季年，萬石君以上大夫祿歸老于家，以歲時爲朝臣。過宮門闕，萬石君必下車趨，見路馬必式焉。子孫爲小吏，來歸謁，萬石君必朝服見之，不名。子孫有過失，不謙讓，^{〔二〕}爲便坐，^{〔三〕}對案不食。然后諸子相責，因長老肉袒固謝罪，改之，乃許。子孫勝冠者在側，雖燕^{〔三〕}居必冠，申申如也。僮僕訢訢如也，^{〔四〕}唯謹。上時賜食於家，必稽首俯伏而食之，如在上前。其執喪，哀戚甚悼。子孫遵教，亦如之。萬石君家以孝謹聞乎郡國，雖齊魯諸儒實行，皆自以爲不及也。

〔二〕索隱 上才笑反。謙讓，責讓。